



Республикалық жастар газеті

Ақмешіт ЖАСТАРЫ

...Мен жастарға сенемін!

Мағжан



№11 (548)
14 наурыз,
2024 жыл

Газет 2013 жылдың қыркүйек айынан бастап шығады



ЖАНКЕНТТІҢ ЖАСЫ АНЫҚТАЛДЫ

Қорқыт ата атындағы Қызылорда университетінің Археология және этнография ғылыми орталығының ғылыми қызметкері Жетесби Сұлтанжанов Германияның Тюбинген университетінде ғылыми тағылымдамадан өтіп, елге оралды.

Осы орайда шетелде біліктілігін шыңдаған ғалыммен тағылымдаманың маңызы, археологияның даму барысы жөнінде әңгімелестік.

– «500 ғалым» бағдарламасы аясында Германияда ғылыми тағылымдамадан өттіңіз. Бұл елдегі білім беру жүйесінің ерекшелігі неде? Германияны таңдауыңызға не себеп болды?

– Германияның жоғары оқу орындары әлемдегі ең үздік, яғни ТОП – 200 университеттің қатарында. Бұл елді таңдауымның себебі білім берумен қатар, ғылым саласы, оның ішінде археологиясы жақсы дамыған. Эберхард Карл атындағы Тюбинген университеті мен Қорқыт ата атындағы Қызылорда университеті бірнеше жылдан бері әріптестік байланыс орнатып, археологиялық бағытта бірлескен жұмыстар атқаруда. Екі елдің ғалымдарын біріктірген жобаларға өзім де қатыстым. Сонымен қатар, бұл білім ордасынан бөлек Неміс археология институтындағы Еуразия департаментінің материалдарымен таныстым.

Тағылымдама алты айға созылды. Оқу орындарының кітапхана қорымен қатар Еуразия департаментінде Өзбекстан, Қырғызстан, Ресей сияқты бізге жақын орналасқан мемлекеттер туралы мәліметтер базасы бар. Бұл тақырыпты тереңірек тануыма жол ашты. Тюбинген университетінде негізінен ғылыми жұмыс жүргізудегі еуропалық әдістерді меңгердім. Еуропалық зерттеушілердің монография, диссертацияларының өзіндік ерекшелігі болатыны рас.

5-бетте

БАЛА ҚАУІПСІЗДІГІ: БҮЛДІРІШІНДЕРГЕ ҚИЯНАТ КӨБЕЙДІ



Суретті түсірген Н.НУРЖАУБАЙ

Бүгінде әлсізге әлімжеттік көрсетіп, жұдырық ала жүгіру белең алды. Әсіресе балаға қатысты зорлық-зомбылық оқиғалары жаға ұстататыны жасырын емес. Мәселен 2022 жылы 719 кәмелетке толмағандар жыныстық қол сұғылмаушылыққа қарсы қылмыстардың құрбаны болған. Қоғамдағы өзекті мәселенің бірі – балалар мен жасөспірімдер арасындағы аутоагрессивті мінез-құлқ пен суицид. Бұл бойынша өткен жылы 95 факт тіркелген.

2023 жылға арналған Wisevoter есебінің дерегіне сүйенсек, Қазақстан суицид статистикасы бойынша 178 елдің ішінде 19-ыншы, балалық шақтың қорғалуы бойынша елдер рейтингінде 180-нен 50-інші орынға жайғасқан. Енді кешенді жоспарлар бекітілуде. Бұл құжат бала құқығын қаншалықты қорғамас? Ал психологиялық күйіне кім жауапты? Саралап көрелік.

2-бетте

КРЕДИТОМАНИЯ ЕСЕПІ

Жастар несиеге неге құмар?

Қазақстанның Қаржы нарығын реттеу және дамыту агенттігінің төрағасы Мәдина Әбілқасымова Мәжіліс қулауында елімізде 18-20 жас аралығындағы 480 мың адамның тұтынушылық несиеі бар екендігін атап өтті. Оның ішінде проблемалық қарыз алушылардың саны 47 мың адамға жеткен. Мәселені шешу үшін заң аясында жастарға несие беруді шектеуге қатысты шара қабылдауға ұсыныс ортаға салынған болатын. Ендігіде қарызға батқан студенттер несие рәсімдей алмайды. Яғни тұрақты табыс көзі жоқ студенттер мен жұмыссыз жастар банк көмегінен үміттенбесе болады.

Әлеуметтік желіде қарызға несие алып беремін деген жарнамаға көптеген жанның алданып қалғаны туралы бейнероликтер тараған болатын. Досы, жақын адамы қиын жағдайға түсіп, төлеймін деген бір сөзіне сеніп, банкке берешек болғандар, бүгінде біреудің несиесін төлеумен-ақ әбгігер. Көпшіліктің жастар несиесіне қатысты пікірі де нақты емес. Бірі төлей алса неге алмасқа десе, енді біреуі бұл бойға сініп бара жатқан жат қасиет деп біледі.

Мәселенің мәні мынада: жастардың несие алуға мүмкіндігі жоғары, себебі банктер бұл процессті оңтайландырып қойған. Жұмыссыз болса да, несиеге қол жеткізуге еш кедергі жоқ. Бизнес бастаймын деп те банкке берешек болып жатқандар аз емес. Алайда қарызға белшеден батуды доғаратын сөз қашан туады? Жалынды жастар еңбекке емес, неге шалқып өмір сүруге құмартып кетті? Сауалдарға жауап іздеп көрелік...

2

ЖЕЗ КИГІМ – ШЕР-КҮЙІГІМ

Ақбөкен – ежелден киелі жануар. Қазақ оны киік деп те атайды. Бұл аң жер бетінде мыңдаған жылдар бұрын мекен еткен мамонттармен бір дәуірде өмір сүрген деседі. Олар өз түрін сақтап қалу үшін әлі күнге күрес үстінде келе жатыр.



6

Қазақстандағы мекен ететін аймағы – Бетпақдала мен Үстірт. Бетпақдала солтүстік өңірден бастап, Жезқазғаннан оңтүстікке қарай орналасқан. Үстірт популяциясы батысты кесіп өтеді. Олар табиғаттың ауа райына қарай тез бейімделеді. Қыстың сақылдаған сары аязынан қорықпайды, қорғану мақсатында қыста терісінің түсі ақшыл түске, жаз бен күзде қоңырқай түске боялады. Шөбі биік емес жерді мекендегенді ұнатады. Себебі олар жан-жағын бақылап отыру үшін ашық алаңдарда жүруі керек.

«Руза, намаз, зекет, хаж – талассыз іс, Жақсы болсаң, жақсы тұт бәрін тегіс...»
Абай

КӨК ЕСЕК ПЕН КӨП ЕСЕП

Рамазан – дос-жарандармен қойын-қолтық араласып, бауырмашылдық беки түсетін берекелі де мерекелі ай. Себебі, ауызашарға шақырасын немесе шақырыласың дегендей...

Жуырда ел камы үшін қалам тербеп жүрген журналистермен дастархандас болдық. Ауызашар уағыз-насихатсыз өтсін бе? Қаламдас досым Жанәділ ауылдағы көк есек жайлы әңгімені тәптіштеп баяндап

аларлықтай-ақ екен. Болған оқиға қасиетті Рамазан айына қатысты болғандықтан, іште сақтап қалу мүмкін емес. Өздеріңізбен бөлісуді жөн көрдік.

6



Суретті түсірген Н.НУРЖАУБАЙ

Astana Hub – орталық Азиядағы IT стартаптардың ең ірі халықаралық технологиялық паркі. Мұнда қазақстандық және шетелдік технологиялық компаниялардың дамуы үшін жағдай жасалған. Орталықтың миссиясы – дамыту орталығына айналу, мықты IT-компаниялар құру. «Цифрлық Қазақстан» мемлекеттік бағдарламасының аясында 2018 жылы IT аренаға аяқ басқан орталықтың жұмысы қарқынды жүруде. Бүгінде технопаркке 1 393 IT компания тіркелген. Жалпы қаржыландыру көлемі 245 млрд теңгені құрайды.

Қажеттілік пен сұраныстың артуы есебінен көптеген компаниялар білікті маманға мұқтаж. Мемлекет басшысы Digital Bridge – 2022 халықаралық технологиялық форумы аясында 2025 жылға қарай кем дегенде 100 мың жоғары білікті IT маман даярлау міндетін қойғаны баршаға мәлім. Білікті мамандардың тапшылығы мәселесі аясында Astana Hub технопаркінің тәжірибесін өңірлерде тарату жұмысы қолға алынды. Нәтижесінде ел аймақтарында IT-стартаптарды қолдау және инновациялық жобаларды дамыту үшін 12 өңірлік IT-Хаб ашылды. Өңірлік хабтар өз аймақтарында инновациялық жобаларды әзірлеумен, IT саладағы мамандарды оқыту және даярлаумен айналысады.

Ақпараттық технологиялар саласы белсенді дамуда. Бүгінде IT бағыты үздіксіз жаңа жұмыс орындарын ашатын саланың біріне айналды. Осы орайда стартап мәдениетін қалыптастыруда жоғары көрсеткіштерге не Astana Hub халықаралық технопаркінің жұмысымен танысасқ.



Сондай-ақ олар жергілікті IT қауымдастықтарды дамытып, оған барлық мүдделі тұлғалар қосыла алады. Стартап жобаларды әзірлеудің инкубациялық кезеңінде кәсіпкерлікке оқыту, инвестицияларды тартуға көмек көрсету, қаржылық есеп және PR қолдау көрсетіледі.

Өткен жылы ақпараттық технологиялар саласы бойынша аймақтарда 784 іс-шара ұйымдастырылып, 24 702 адам қатысты, сондай-ақ 194 стартап-идея ұсынылып, 7 ауқымды халықаралық деңгейде форум өтті. Нәтижесінде бытыр өңірлерден 70-тен астам компания

Astana Hub-қа қатысушы ретінде тіркеліп, қазіргі таңда еліміздің IT секторының дамуына белсенді үлес қосуда.

Мамандар даярлауда қосымша білім беру, қажетті ресурстармен қамтамасыз ету маңызды. Мәселен, IT саласында адами капиталды дамытуға бағытталған Tech Orda бағдарламасы, No Code, Startup Garage, Beta Career, Hero Training, Tech Girls, Alem School сынды оқыту бағдарламаларының аясында 20 мыңнан астам адам дағдыларын дамытқан.


Соңғы жаңалықтарға кезек берсек, Катардың астанасы Дохада өткен Web Summit

конференциясына отандық 8 стартап қатысқан. Солардың бірі – blockchain технологиясын пайдаланып, құжатқа онлайн қол қоюға, цифрлық форматта құжаттарды жасау және қол қою процесін оңтайландыруға арналған Trustme стартап жобасы.

Үздіктер қатарында нәзік жандар да бар. Бүгінгі таңда технопаркте тіркелген компаниялардың 250-ге жуығын әйелдер басқарады, соның ішінде 25 пайызы өз қызметтерін шетелге шығарып үлгерген.

IT-дің астанасы саналатын, әлемнің түкпір-түкпірінен келген дарындардың отаны, ең ыңғайлы технопарк Кремний алқабы секілді ақпараттық технологиялар әлемінің отаны болу Қазақстан үшін арманда қалмасына сенеміз.

ШЕКАРАСЫЗ ШЕКСІЗДІК



ЖАҢА ӘЛЕМДІ КОДТАУ

Apple Worldwide Developers Conference – дәстүрлі түрде Калифорнияда өтетін дүниежүзілік конференция. Алғашқы WWDC 1983 жылы Монтеррейде ұйымдастырылды. Жаңа өнімдердің таныстырылым алаңына айналған іс-шараның тақырыбы мен бағыты өзгеріп отырады. Мәселен, өткен жылдың маусым айында ұйымдастырылған жиынның басты девизи – «Жаңа әлемді кодтау». Тақырып аясында MacBook Air 15, Mac Studio, Mac Pro және жаңа операциялық жүйелері, сонымен қатар революциялық құрылғы санатына енген Vision Pro таныстырылды.

Өндірушілердің айтуынша, Vision Pro – бұл заманауи теледидар, компьютер және VR көзділдіктің жиынтығы. Vision Pro көзділдігінің негізгі мүмкіндігі – пайдаланушыны виртуалды әлеммен байланыстыру. Осылайша қолданушы шынайы және виртуалды әлем үйлескен ғаламды тамашалай алады. Қарапайым функциясының бірі – фото, видео түсіру болса, экранда IMAX өлшеміне дейінгі кинотеатр режимі бар. Vision Pro арқылы Magic Keyboard, Magic Trackpad және microLED дисплейлерімен жабдықталған, тіпті 23 миллион пиксельдегі мөлдір суретті бейнелейді.

ИННОВАЦИЯ МЕН СӘН

IT саланың қарқынды дамуы сән әлеміне де әсер етті. 1946 жылы дизайнер Кристиан Диор мен кәсіпкер Марсель Буссак құрған Dior сән үйін білмейтін адам жоқтың қасы. Міне, дәл осы француздық сән үйі сатып алушыларына жаңа көзділдік ұсынды.

Америкалық Ray-Ban компаниясымен қоллаборация нәтижесінде Meta WayFarer өнімі дайындалды. «Өр сәттен ләззат алу» девизімен ұсынылған күннен қорғайтын көзділдікте инновация мен стиль біріккен. Мәселен, айналаны фото немесе видеоға түсіруге арналған камера, жарық диоды, көзділдікті басқаруға арналған сенсорлық аймақ және дыбыс деңгейін реттейтін батырма бар.

ТРЕНДҚУМАРЛЫҚ НЕМЕСЕ ҚАЖЕТТІЛІК?

2007 жылға оралсақ. Дәл сол жылы Apple компаниясы iPhone ұялы телефонының алғашқы моделін шығарды. Қарапайым байланысқа арналған құрылғының бағасы да, өзі де қолжетімсіз дүниеге айналды. Жыл сайын жаңа моделі жарық көретін компанияның тауарларына көңілі толмайтындар бар. Бірі көлемін, бірі бағасын айтады. Бүгінде жаңа моделі 600 мың теңгеге бағаланса да, екінші бірінде – iPhone. Иә, мұны заман талабымен байланыстыруға келеді.

«Сапалы телефон – сапалы контент» деседі қоғам. Алайда қажеттіліктен аттап, құмарлыққа берілген жастар трендтен қалмас үшін алып жатқаны рас. Жинаған қаражаты болса мейлі, несиеге алғаны, әлі алатыны қаншама. Жоғарыда аталған кемі 1,5 млн теңгені құрайтын көзділдік мәселесі де қажеттілік емес, құмарлыққа айналасын білмейміз.

IT САЛАСЫ МАМАНҒА МҰҚТАЖ



ҚАЛҚАНША БЕЗІН ЕМДЕУДЕГІ ИННОВАЦИЯЛЫҚ ӘДІС

Кардиология және ішкі аурулар ғылымы-зерттеу институтында ұытты емес бір түйінді зоб анықталған екі бірдей науқасқа жаңа инновациялық әдіс арқылы аз инвазивті ота жасалды.

Қалқанша безінің қатерсіз түйіндерін емдеудің бірегей, аз инвазивті әдісі – радиожиілікті абляцияны енгізу. Мамандардың айтуынша, радиожиілікті абляция – ісік тініне әсер етудің заманауи әдістерінің бірі. Оның мақсаты – ісікті толығымен жою, нәтижесінде қалқанша без түйіндерінің патологиялық жасушалары жойылады, бездің сау тіндері зақымдалмайды. Бұл әдіс хирургиялық алып тастаудың тамаша баламасы.

Ота жасалған науқастардың бірі 47 жастағы түркістандық, екіншісі Жамбыл облысының 43 жастағы тұрғыны. Түйіндік түзілімдерді емдеудің айрықша әдісі сәтті өтті. Алдағы уақытта институт қабырғасында мұндай оталарды жасау қолға алынатыны айтылды.

Эр-Риядта инновациялық хабтың ашылуы әлемдік нарықта өңірлік IT шешімдерді халықаралық деңгейде ілгерілетуді қолдауға сеп болады.

ЭР-РИЯДТА AL-FARABI INNOVATION HUB АШЫЛДЫ

Жаңа инновациялық хабтың басты тұжырымдамасы – Орталық Қазақстаннан Сауд Арабиясына дарынды кәсіпкерлер мен инновациялық стартаптарды тарту. Сонымен қатар, «Tumar» венчурлік қорынан бастапқы инвестиция алу, инкубация, акселерация бағдарламаларын және құнды салалық білім мүмкіндіктерін ұсыну.

5 жыл ішінде мақсатты KPI – кем дегенде 3 жаңа стартапты дамыту, кемінде 3005 миллион тарту және осы стартаптар ұсынатын 1\$ миллиардтан астам қызметті экспорттау.

Айта кетейік, өткен жылы Калифорнияның Пало Альто қаласында Орталық Азия елдерінің өкілдері үшін Silkroad Innovation Lab ашылды. Хаб Орталық Еуразиядан келген стартаптар мен кәсіпкерлерді американдық нарықта өз кәсіпорындарын құру немесе кеңейту жолдарын іздеуде қолдайды. Сондай-ақ Google, DraperUniversity, StartX, Microsoft және Дүниежүзілік банк сияқты жаһандық серіктестер тартылып, азаматтар үшін ең жақсы озық шешімдерге қол жеткізуді қамтамасыз етті.

WEB SUMMIT QATAR 2024

Катар елінің Доха қаласында инновациялар мен технологиялар әлеміндегі ауқымды іс-шаралардың бірі өтті. Web Summit Startup Program аясында қазақстандық сегіз стартап дүниежүзілік аренада таныстырылды.

Web Summit – инвестициялар мен жаңа серіктестіктерді іздеудің тиімді алаңы. Стартаптар өз жетістіктерін ұсынып қана қоймай, қарқынды дамуға мүмкіндік алады. Сондай-ақ технология индустриясының әлемдік көшбасшыларымен тәжірибе алмасады.

Конференция барысында отандық жоба авторлары питчинг, менторлық сессия және нетворкинг іс-шараларына қатысты. Олар әлеуетті инвесторлармен танысып, серіктестер табу мүмкіндігіне ие болды.

Биыл конференцияға 15 мыңнан астам бизнес өкілі, инвесторлар мен көшбасшылар жиналды. Ең алғашқы Web Summit 2009 жылы Дублинде өткен болатын.

